



Pa motibo cu nan a bay protesta

SCHOOL MAVO A CERA PORTA PA ESTUDIAntenan CU CANDAL



ORANJESTAD (AAN) - Alumnonan di MAVO a huelga ayera pa defende loke nan ta considera nan derecho, di bay Jump-up di Carnaval.

Den oranan di mainta un grupo di estudiante a bay Departamento di Enseñanza, caminda cu nan a

hiba un papel puntrando pakico lo no tin Jump-up pa nan. Despues nan a bay school back y nan a haya sorpresa cu nan a keda cera pafo, na candal.

Esaki ta alumnonan di Maria College. E muchanan a parti panfleta bisando cu 2'or di atardi nan lo a bolbe

huelga hunto cu tur otro school, y no a logra pasobra a ser entendi cu e parada lo a bay door.

Pa tal motibo e muchanan no a bay huelga pa 2'or di atardi, pero nan a keda masha desapunta cu porta di school lo a ser cera cu candal.

Carnaval 40 ta ultimo vez:

DEN FUTURO LO NO TIN JUMP-UP MAS DEN ORANAN DI SCHOOL

A accede awor pa trece tranquilidad

ORANJESTAD (AAN) - Ta varios reaccion a yega na redaccion di DIARIO ayera pa motibo di e cancelacion di jump-up pa alumnonan di MAVO, relaciona cu carnaval, y cu a tanta tanto protesta y critica door di estudiante, mayor y algun docente.

DIARIO no kier a profundiza tanto riba e protestanan ricibi ya cu e punto aki ta ampliamente conoci den comunidad. Sinembargo redaccion kier a yega mas na e fondo di e problema y a indaga den busca di mas informacion.

DECISION FINAL

Manera ta ser conoci Diabierna mainta director di Directie Onderwijs y Ministro di Enseñanza a reuni pa motibo di e manifestacion cu alumnonan di MAVO tabata tin como accion di protesta pa e motibo conoci.

Ministro a duna su O.K. y a bay di acuerdo pa e aña aki e jump-up continua, djis pa trece tranquilidad pero ta asina aki cu pa Carnaval 40 ta e ultimo oportunidad, pasobra den futuro lo no tin jump-up pa estudiantenan mas den oranan di school. E unico faya cu ta ser acepta pa Departamento di Enseñanza, den henter e asunto aki, ta cu nan no a duna suficiente informacion y di manera cla, loke si ta bay ta e caso pa futuro.

DIARIO tin entendi cu Dialuna awor lo tin splicacion riba press release tocante e motibonan, cu redaccion tog a logra di conoce.

PUNTO DI BISTA DI ONDERWIJS ZAKEN

DIARIO tin entendi cu for di punto di bista di Onderwijszaken, e jump-up masha bon por worde organiza tremerdia ora school caba envez di perde oranan escolar pa haci tal. E punto di bista aki a ser splica na varios

mucha cu a presenta na Directie, cual argumento no a convence nan como tampoco a convence varios docente.

Pa Onderwijs Zaken nan no ta mira e situacion riba ningun linea politico pero riba cumplimiento di un programa estructura.

Actualmente ta tumando lugar un restructuracion riba programa di enseñanza y manera DIARIO a trese dilanti caba, varios vak lo cambia drasticamente y e docentenan mester asisti na cursonan di recapitacion. E turno a pasa pa Colegio Arubano siman pasa. Otro siman ta pa schoolnan MAVO y esun siguiente ta pa Schoolnan Tecnico.

Esaki ta trece cune cu e estudiantenan ta perdiendo hopi les y Directie Onderwijs ta haya cu e situacion ta perhudica e alumnonan mes aunque ta pa nan bon den futuro. E problema mas grandi ta sinta den e hecho cu tin escarsedad di maestro loke kiermen cu no tin reemplazante pa esnan cu tin cu haci e cursonan.

DIARIO tin entendi cu Directie Onderwijs kier concientiza e hobennan estudiante, mayornan y tambe algun docente cu e departamento di enseñanza no tey pa gana popularidad, pero pa cumpli cu un meta. Esta di cubri un programa anual di enseñanza cu e menor perdida di tempo posibel pa beneficio di e alumnonan mes.

Esaki ta e punto di bista cu segun DIARIO tin entendi ta worde defendi pa Departamento di Enseñanza dilanti e Ministro concerni y riba cual cada lector por forma su propio criterio.

Den articulo apart redaccion ta bay analiza un situacion serio den tereno di enseñanza cu a bini dilanti door di opinion di un mayor, y riba cual punto a ser investiga pa DIARIO cu un resultado interesante.